

天... 圖書... 管理

桂故目錄

郡國第一

官名第二

先政上第三


先政中第四

先政下第五

先獻第六

游寓第七

雜志第八



桂故

目錄

卷八

雜志集八

雜志集七

雜志集六

雜志集五

雜志集四

雜志集三

雜志集二

雜志集一

桂故凡例四條

一先政先獻畧為之傳蓋既識前言須稽往
行故曰不知其人可乎然非遺言在桂留
名在山無所啓余心矣

一傳中先獻不及先政十分之一非貴遠賤
近也直以鄉乏遺文後無的據即如所載
張秦諸公記文微放史漢主父嚴徐以所
上書為傳爾

一傳中如題名某山及與某人同遊某山之

類書重言複豈不是厭第以斯志新出多
非舊聞不一一指視所在將謂任臆何杜
衆口

一是書前後頗有辯駁非企賞音用解耳食
畧寄應仲遠作風俗通之意也

桂故第一卷

始安灘山人張鳴鳳論次

郡國

桂故荆屬本南楚之境為郡為國皆以始安
名與秦所置桂林雖土壤相接然楚自楚越
自越名稱昉分著在前史不可營亂失自唐
起如通典風土志諸書本唐人所撰畧不被
圖按求故地遂一切曰桂秦與魏晉桂林郡
縣幾淪滅矣所以失者蓋因梁置桂州刺史

於始安刺史雖可假桂而置始安顧可循桂而并沒其稱耶此不涉史者之過也茲特備列用以舉正焉

前漢地理志

零陵郡所領縣十

一始安

後漢郡國志

零陵郡所領十三城

一始安侯國

按志注云屬荊州刺史夫始安屬荊則當時桂林區別明甚隨考漢志屬交州者為鬱林郡領縣十二一曰桂林其郡名下注云故秦桂林郡武帝更名曰鬱晉至隋皆因之

三國吳志

甘露元年十一月以零陵南部為始安郡

晉書地理志

始安郡注云吳置統縣七

始安 始陽 平樂 荔浦 長安 熙平

永豐

宋書州郡志

始建內史 注云宋明帝改今名領縣七

始安 熙平 永豐 荔浦 平樂 建陵

樂化

齊書州郡志

始安郡 注云宋名始建今改之領縣六

始安 荔浦 建陵 熙平 永豐 平樂

梁書武帝紀

天監六年七月丙寅分廣州置桂州

大同六年置桂州於始安郡督南桂林等二

十四郡

按始安初屬荊州中屬湘州後改屬廣州受

彼刺史所督察未有桂稱其設州稱桂為部

刺史治所自梁始曰南桂林即秦桂林也

陳書無志

隋書地理志

始安郡 注云梁置桂州平陳後置總管府
大業元年府廢統縣十五

始安 平樂 荔浦 建陵 陽朔 象

隋化 義熙 龍城 馬平 桂林 陽壽

富川 龍平 豪靜

唐書地理志

桂州始安郡中都督府至德二載更名曰建陵後
復故至大順三年始建府號曰靜江軍領縣十一

臨桂 理定 靈川 陽朔 荔浦 豐水

脩仁 恭化 永福 全義 古

其陽朔下注云武德四年置歸義縣

按隋以前首縣皆名始安未有桂稱惟隋
第十一縣曰桂林注云大業初併西寧縣
入至唐乃改首縣名曰臨桂注云本始安
武德四年置後因之

五代史職方考

桂州靜海軍初屬湖南馬氏後屬南漢

宋史地理志

靜江府本桂州始安郡靜江軍節度大觀元年為大都督府又陞為帥府舊領廣南西路兵馬鈐轄兼本路經畧安撫使紹興三年以高宗潛邸陞府寶祐六年改廣西制置大使後四年廢復為廣西路經畧安撫使領縣十

臨桂

興安

靈川

荔浦

永福

脩仁

義寧

理定

古

永寧

南渡後無永

寧縣

灑山人曰世之議者必云屠睢之所擊任囂之所戍翁居之所監非此桂林明矣史祿鑿渠厥壤安在夫浚灑之流以開餉道為伐粵之資非置郡後而始鑿也無足疑者或者又以古有八桂為言山海經曰桂林八樹在番禺東質今吾桂果番禺東耶西耶名之不正遂令郡志以吳桂林太守脩允牽入抑何其輕信已或又謂余之著書亦桂始安何夫絳之有故也猶豐之有新也名從其新實存其故執故以非新則僭徇新而忘故則愚廣置

詰難為以秦所開設亂楚舊疆云爾甚者又
妄附交南必以唐中葉有安南桂管宣慰使
之名不知爾時或因交南不庭遙為撫喻或蕩
定之後徙其人於桂旁地不則桂當交人貢
道貢使始入一慰勞之也邕交鄰境尚不得
爭咫尺無故而舉桂數千里之外附之為誤
孔甚用以牖愚豈憚涉僭抑萬世後獨無解
者耶有則昔人所謂旦暮也已奚其僭

桂故第一卷

桂故第二卷

官名

夫為民師而命以民事昔謂之紀近迴覽前
策莫有問者以指名可知其職非若上古摹
雲譎鳥象火紀水難厝思也故問者不憚越
國傳者自謂顓門即如周禮一書摠之所載
不過六卿諸屬與其所受之事文古義深劉
歆雖獨識不能銳精至鄭賈解行猶多遺闕
孰謂官名乃細故耶唐宋以降事不師古冗

流猥衆官號不雅毋假考古者皆知之顧志者往往不為別白如宋經畧安撫轉運提刑所在並設皆綱紀全部之上其外又有常平諸官頗相頡頏故諸山題名迭為先後恐見者有所不解因并籍記亦以補志者之闕焉諸官首舉始安令何名見前史自縣起示有先也

前漢

始安縣縣有令或長公卿表云縣令長掌治其縣萬戶以上為令秩千石至六百石減蓋戶為長秩五百石至三百石皆有丞尉秩四百石至二百石是為長吏

後漢

始安侯國國有相百官志云每縣邑道大者署令一人千石其次署長四百石小者署長三百石侯國之相秩次亦如之

三國吳

始安郡其職名不見於志乃他郡或有之大

氏倣漢所置也

晉

始安郡職官志云郡皆置太守諸王國以內
史掌太守之任

宋

置始建國內史

齊

改始建為始安郡仍置守

梁

始置桂州刺史

陳

因梁之舊亦置刺史

隋

平陳後置總管府百官志云總管刺史加使
持節

唐

所置不常如都督府則稱桂州都督開耀間
改稱管內經畧使後復置都防禦觀察招討

處置等使大順三年陞桂管經畧使為靜江
軍節度使蓋其季也乃常稱或檢校尚書及
中丞桂州刺史兼桂管防禦觀察等使而已
天寶元年改州為郡改刺史為太守至德一
載復諸州及官名州屬則有別駕長史司馬
錄事叅軍而節度之屬又有副大使知節度
使行軍司馬副使判官支使掌書記推官巡
官衙推官之類
五代楚

馬氏初稱桂管觀察使後以其弟實為靜江
軍節度使

宋

知桂州率以諸館閣祕殿兼經畧安撫司使
紹興三年為靜江軍則稱知靜江府提舉學
事管內勸農使充廣南西路兵馬都鈐轄經
畧安撫使兼提舉買馬不一自桂及瓊並受
節制戎機民事小則顯決大則奏請後併黔
南為一路所部益廣故稱帥府及寶祐改制置

大使兼轉運則又稱制閫矣其屬有幹當公
事主管機宜文字準備將領準備差使而通
判於州郡為上佐云

轉運使副使判官各一人掌經度一路財賦
歲行所部檢察儲積凡吏蠹民瘼悉條以上
及專舉刺官吏之事其屬有主管文字幹辦
官各一人文臣武臣準備差遣差使多寡無
定數

提點刑獄公事掌察所部獄訟凡禁繫淹延
不決盜竊捕竄不獲皆劾以聞及舉刺官吏
之事舊制參用武臣熙寧初罷之六年置諸
路提刑司檢法官紹聖初以提刑兼管坑冶
乾道八年以人言諸路經摠制錢併委提刑
官督責後又以人言廣西所部州軍最多提
刑或照原降指揮分上下半年就鬱林州與
靜江府兩處置司其屬有檢法官幹辦官
提舉常平司提舉學事顓攝不一後或罷第
令兼攝

走馬承受舊隸經畧安撫司歲一入奏有事則不時馳驛上聞崇寧中始召不隸政和六年改稱廉訪使者與經畧安撫等夷矣靖康初罷之

縣置皆同兩漢百官志令長而下惟有丞尉獨無主簿列傳內始有署為主簿之文厥後因之乃注為定負在尉上

梁陳以後有都督廣交越桂諸軍事或督湘衡武桂諸軍又衡桂成合四州諸軍權出兼督又有遙領至宋遙領益衆其行軍摠管所有長史司馬皆以行軍立號宋又有體量安撫經制賊盜諸使及招安捉賊捉殺等名皆以征南至而唐之桂管安南都護蓋因交南有事間一置之路分兵馬都監兵馬鈐轄管界巡檢等官皆戎臣備邊盜者宋末又有都統制兼大使遣暫摠戍雖非常設以有名諸山故附列之篇

濰山人曰余為官名見漢世之文辨物正辭

義該事舉由周而後文訖於此蓋嘗學之研
精史漢旁及黃圖雜記諸書嘉所稱謂寧張
局署吏間哉宮殿樓觀館舍臺亭被以一字
咸極精雅論者美之謂炳焉與三代同風信
矣唐至中葉六典失守羣盜擅節鎮廝興濫
侯王使名重沓幾至百字宋初稍懲又經元
豐更定官制猶不能澄汰故習至其後領兼
紛紛而名號濁惡亦孔之甚蓋宋自景德慶
曆四五十年間運鍾隆盛人亦太康國體之
墮廢吏治之苟且始不莊議後相曲徇不思
更化矯俗黨同妬異小人乘之遂煽黨禍其
極也舉翠華而汙黃沙豈可令熙豐首事者
獨任其咎哉不獨談治講學亦爾將亡之主
請謚為理何理之遵安坐待盡文物不振恒
必由之觀桂勝諸所錄出自宋者何可掩也

桂故第二卷

桂故第三卷

先政上

記事之書國史而下則有外志如汝南三輔
華陽諸書皆州郡之所采輯郡縣之所甄列
大者侯牧次則令長其頒示科條與夫治迹
著在境內者罔不籍記雖年代荐更而伊人
如在近可述其善政遠可詠其流風不以異
姓滅彼名籍如齊起太公上泝蒲姑歷逢伯
陵至於季蒯卒推本爽鳩氏歷歷有據晏子

故博物君子不有典籍藏在舊府何由默識
而取辨立譚哉兩漢令相史蓋闕錄追尋末
從良可惜也故本諸史及他書與名勒諸山
者或撫其本傳或循其遺詠微以數語畧存
風槩為諸先政傳叅佐從事亦頗豫焉乃任
華楊衡李商隱數君子其迹若類羈游其名
實在桂府且於時府主得自辟選諸君例沾
奉廩故不敢附之游寓

張九齡字子壽曲江人自洪州都督徙桂州
兼嶺南按察選補使謁虞山舜廟有文其詩
則巡按自灘水南行者甚稱山川之佳至云
日因詭容逆心與清暉滌驚嘆其勝如此劉
禹錫乃謂九齡為始安有瘴癘之嘆非也禹
錫蓋因九齡當國時曾建言宜峻遷客之防
禹錫屢經謫外又久不得量移內地故追憾
九齡且云無後况不安瘴癘乎

李昌巖大曆間以御史中丞桂州刺史兼桂
管觀察防禦使有討西原賊潘長安功吏士

桂山
卷三
為刻平蠻頌鎮南山下又嘗修飾舜祠祠後
虞山亦有碑其時韓雲卿以文韓秀實以書
李陽冰以篆知名當世二刻皆三人所為獨
秀山又有監察御史裏行鄭叔齊為昌巒作
新開石巖記中言昌巒即山建學大興弦誦
昌巒於桂蓋多可稱者尋以荆南節度使討
梁崇義任華於桂稱昌巒忠義特達有文武
才略或者謂之實錄

任華其詩尚竒如贈李翰林杜拾遺兩詩古
無其體在桂送祖評事赴黔府序云出餞何
許舜亭峩峩凭檻窺鼉鼉之窟酌酒滴魚龍
之背及序送宗判官歸滑臺又云二三子出
餞於野霜天如掃低向朱崖加以尖山萬重
平地卓立黑是鐵色銳如筆鋒復有陽江桂
江略軍城而南走噴入滄海橫浸三山則中
朝羣公豈知遐荒之外有如是山水山水既
爾人亦其然華是時為昌巒府中叅佐同時
有蘇侍御澣武功人佐前御史中丞張公為

判官

戎昱荆南人登進士第衛伯玉鎮荆南辟為從事後復應桂府之辟有登西山上陸大夫詩又兩有李大夫詩陸失其名李則昌巒然於李深感其恩亦足以徵昌巒之能容士昱後官辰虔二州刺史

孟簡字幾道德州平昌人簡工詩尚節意以善交聞所知既歿多卹其家一時名士柳宗元韓愈諸人皆樂與之遊晚節燥競佞佛最甚頗為時所誚獨秀山曾有題名似稱刑部員外郎疑是時或倅桂州云

馬總字會元其家廟碑云以御史中丞都護日南以國子祭酒觀察桂州史稱其都護安南廉靖不撓用儒術教其俗政事嘉美僚吏安之後從桂入為刑部侍郎官終戶部尚書總喜讀書雖視吏事書不去前即所輯意林其涉獵亦頗衆矣疊綵山有安南桂管宣慰使馬日溫送馬祭酒刻日溫無所考馬祭酒

者必總也

柳宗元字子厚其先河東人文名爵位詳具唐書中其自永州司馬為柳州刺史曾一至桂有桂州城北望秦驛手開竹逕至釣磯留待徐容州詩曰幽逕為誰開美人城北來王程儻餘暇一上子陵臺又為裴行立記些家洲其文於時與韓齊名若登高而賦義深語麗有魏晉間風藻則韓無以過也遠謫蚤死宦學未竟匪人是抑天亦忌之悲夫

裴行立自安南經略使徙桂管觀察曾討平黃峒賊即城東灘江中訾家洲造梁構亭跨洲杭水為一時館宇之最屬柳子厚記之然行立議討西源初妄謂蠻弱首請發兵盡誅叛者欲徼幸有功憲宗許之行立兵出擊更二歲妄奏斬獲二萬罔天子為解自是邕容士民以戰戍疾疫死者甚衆而調費至無所給其禍由行立陽旻二人當時莫不咎之韓愈亦謂自行立旻建征討生事詭賞邕容兩管日

以彫弊人神共嫉之不知後來何以行立祀
名宦蓋不考史而徒讀柳文者故爾

李渤字濬之寶曆間為桂管觀察使渤與兄
涉早隱廬山中徙少室元和初戶部侍郎李
異諫議大夫韋况交章薦之以右拾遺召河
南少尹杜兼遣吏敦促渤上書謝不至洛陽
令韓愈遺書規渤心善其言始出山家於東
都久之以著作郎召遂起歲餘遷右補闕渤
自山人召起奮發敢言用荅時望封章日上

天子頗徇所請擢給事中賜金紫服後出為
桂管濬靈渠廣水道又為桂奏請設常平以
其暇日開隱山疏南溪賓佐往遊踵為勝集
隱山相傳有皇甫湜吳武陵韋宗卿所為記
湜文不存南溪則渤自序與其詩並傳涉有
詩名曾至桂省渤其弟淑渤亦有喜再至歌
吳武陵慷慨尚奇李渤請為侔故事副車上
任具橐鞬通謝又數日毬塲治宴酒酣武陵
致詞云奉約同遊山水柰何責望以故事乎

勃不得已強從之已乃於坐間褰衣咲語勃
醉益怒命左右粹送衙司斬之時都押衙朱
蘭以為不可遂引共寢勃半夜聞家人哭聲
怪問所以家人告以聞殺武陵勃遽起召蘭
乃知亡恙比明勃至武陵寢所卑詞引過遂
歡好知初先是武陵居永州柳宗元賢其為
人及後為裴度所知每為度言宗元义斥蠻
中當量移使得優游江湖又為書與侍郎孟
簡言宗元义斥不還一旦蒙霧露而死柳氏
無後矣後出為韶州刺史以賊貶潘州司戶
叅軍卒然武陵好文篤舊其於宗元有占節
士之風在桂時為勃記隱山又有韋宗卿者
作六洞記宗卿亦自藻贍然不知在桂為何
官

元晦相國稹從子其自吏部郎中受諫議大
夫制稱其往在內庭嘗感先顧奮發忠懇不
私形骸俯伏青蒲至於雪涕蓋敢諫之士出
為御史中丞桂管觀察使見疊綵山有干越

四望左右迴翼心大樂之引水穿沼治亭院
其間晦自命名其小記與題篆似皆出其手
寶積山亦建一亭曰巖光晦鏡有詩今失所
在又嘗以灘山不可與溫泉驪山並稱改曰
儀晦於元氏亦秀而文有勝抱者乃杜牧之
薦其友人韓又云又惡晦之為人將有所揚
必有所抑又絕無指實恐牧之斯言非篤論
也
盧匡桂管觀察時以九日集諸叅佐登東樓

宴飲長史于郢為序郢字相門以諫議大夫
知制誥進禮部侍郎朝有大典策必出其手
為三司使治薛邕獄忤上旨貶桂州長史復
為太子賓客與時相陸贄不平出為杭州刺
史再貶衢州徙江州卒郢于桂著文最多
韋瓘字茂弘仕累中書舍人其自桂管觀察
使除賓客分司以少時傲忽馬植比植柄政
追懷舊事乃以分司罷歸洛詳具風土記中
唐書謂瓘與李德裕善李宗閔惡之德裕罷

貶瓘明州長史會昌末累遷楚州刺史終桂
管觀察使誤矣洪氏隨筆有辯瓘浯溪留題
云其官位與見惡宗閔質李德裕罷相年歲
皆不合且自言旁考諸書竟不知瓘去國坐
何事豈未見風土記耶

楊漢公字用乂桂管觀察使於訾家洲宴遊
賦詩從事陸鴻休和之

張固亦桂管觀察使大中間以重陽節宴於
東觀觀在今七星山從事盧順之即席贈固

以詩固亦有和章獨秀山亦有固詠所著有
幽閒鼓吹唐史遺事通考云固懿僖間人

鄭亞大中初為桂州刺史御史中丞桂管防
禦觀察使辟李商隱為判官居府中典其書
記以與李德裕善德裕罷相坐貶循州

李商隱字義山懷州河內人或言英國公世
勣之裔孫第進士調弘農尉後依桂管觀察
使鄭亞府為判官亞謫循州商隱從之凡三
年乃歸李德裕故與令狐楚有隙商隱早事

楚後依亞亞以德裕黨斥外楚子絢憾商隱
不置商隱文名高於一時忌者以絢故目為
輕薄商隱竟與世坎壈終其身任在桂詩文甚
多其自桂林奉使江陵途中感懷之作有曰
既載從戎筆仍披選勝襟瀧通伏波柱簾對
有虞琴宅與嚴城接門藏別岫深閣涼松冉
冉堂靜桂森森此數句狀府廨與獨秀相接
如在目中若西溪及流盃亭恐他處皆有難
定指以為桂

楊衡者吳興人在桂與陳羽念別有云碧桂
水連海蒼梧雲滿山及送公孫器自桂林歸
蜀則云桂流淺復碧潺湲半露石似亦曾臨
清流而興詠者其少時與符載同隱載有送
衡自江陵下南越序自言其學得衡指授最
多孟郊亦有哭衡詩曰君生雲水清君死雲
水渾其為流輩所重如此吳興志不著其名
桂亦莫有知其詩者惜哉

莫休符其自序所著桂林風土記云前賢撰

述有事必書故有三國志荆楚歲時記湘中
記奉天記惟桂林事迹闕然無聞休符因退
居粗錄見聞曰桂林風土記聊以為序時唐
光化二年九月二十三日休符封州開建人
序前自列官位所至銀青光祿大夫檢校左
散騎常侍使持節融州諸軍事守融州刺史
御史大夫以桂勝多引其書故附之傳末
離山人曰唐諸先政若王峻裴懷古韓欽三
四公或愛利著於屯田或信順格於黠賊功
庸茂矣乃棄不錄顧歆豔李元之經營任吳
之序記者何曰此志桂勝非循吏傳也夫隱
山南溪顯於西南疊綵寶積光於東北繫二
公是賴哉李則入山而有隱操立朝而有風
議元事不章其授諫議之制謂其奮發忠懇
伏諫雪涕亦非無所指而然也又其文采皆
可照耀巖壑任才跌宕似出吳右均於吾桂
山水多所潤色乃談者獨取昌黎蓼帶之詠
不幾淺之乎其涉耶古語有之百聞不如一

見昌黎蓋聞者即斯兩句本非詩苑之極則
何足述哉又郡志所采詩多自他處送人至
桂質以身游目覩殊科則余不尚隃度所操
殆與射聲者異矣

桂故第三卷

桂故第四卷

先政中

桂在西南一隅非四戰之地議者必曰中原
有故足可保險偏安十數年動引庸妄人癸
水之讖以為證其說近是而實非也蓋試一
上觀唐宋五代之際乎宣晟始亂馬氏繼之
至番禹劉氏父子而止五六十年間土易三
姓如反覆手其人得自脫於劍戟之鋒矢石
之慘者無幾譬之人身中夏腹心也邊隅四

體也未有腹心受病而四體愉快如常者偏
安之說其可信乎後賴宋稱制加以寬政夷
節鎮建州府黜侯王置牧守解去武健顓任
儒生原野無戰塵之揚海嶠有惠風之扇經
略轉運提刑諸大夫政刑具平聽覽斯暇或
以省耕省斂或以送往迎來或汎於舟或命
乃駕不東之七星則西之隱山諸處來游接
軫勒名選石其抄錄至者余得按之節具為
傳焉

蘇安世字夢得開封人為三司戶部判官入
常博士時歐陽脩以甥女獄事相連權貴人
惡脩者欲因而擠之使安世與中貴雜治安
世竟白其冤脩得不坐權貴人遷怒安世以
以治獄不直黜監泰州稅安世久在外不蒙
召還終廣西轉運使王安石志其墓言安世
十五年不求磨勘其澹於榮進如此雉山有
題名且及其諸子台文等與進士趙楊楊即
其僭台文弟兄皆歷官中外

余靖字安道曲江人以文學稱鄉里自潭州
改桂州時儂智高反召以廣南西路委靖經
制靖測智高必結援交趾脅諸峒以自固乃
遣使諭交趾會兵擊賊又募儂黃諸姓酋長
皆縻以職使不與智高合其後狄青孫沔討
平智高論者謂靖先謀翦智高羽翼功居多
焉徙知潭青兩州以交趾申紹泰之變靖復
安撫廣西龍隱巖有題名熊文友蕭固宋咸
柳涉李師中馬仲方黃照皆同游者宋咸李
師中自有傳

宋咸字貫之建陽人歷廣西提刑轉運使嘉
祐三年知桂州蕭固轉運使王罕命臨桂令
梁庚復開華景洞時咸以提刑為記之石仍
載武提刑文思副使王琚鈐轄供備庫使李
繼明通判屯田員外郎周約

李師中字誠之楚丘人提點廣西刑獄鑿靈
渠奏罷邕管馬軍初邕州蕭注宜州張師正
謀徼邊功注欲以所管蠻峒酋豪往討交趾

云不煩朝廷兵食經略使蕭固轉運使宋咸
為注所餌合詞稱便詔以注奏付師中規畫
可否師中詰難注其議乃阻權轉運使攝帥
事師中嘗著宋頌三章其一神武頌太祖曰
於赫神武不顯其功天命在躬圖惟厥終不
卜不謀付命太宗惟帝之心天地之公其二
文明頌太宗曰於昭文明繼序其皇既有典
常底定四方清廟用章德音不忘其三仁功
頌真宗曰於穆仁功已任天覆萬民靡不壽
懷爾戎狄以及鳥獸吁嗟仁功草木潰茂如
文王之囿頌在龍隱巖鐫者前知合浦縣陳
惇師中政尚清淨不喜用兵多於詩中見意
其頌亦爾非為懲格注議然也

柳開字仲塗大名人自全知桂所著有玄風
洞銘及湘灘二水說亡何坐前在全有卒訟
開開即杖背黥面送闕下有司言卒罪不及
徙召開下御史獄獄具以上削二官黜為團
練副使開於時有文名

王罕字師言其先蜀人徙家於舒為桂州轉
運使名在華景巖罕所蒞號精敏然寬雅有
局士民莫不愛戴之王氏子孫顯聞於舒自
罕始

孫杭黟縣人舉進士為尚書工部郎中廣南
西路轉運使以文學見於世詩在隱山

吳及字幾道通州靜海人為右司諫以勁正
稱遇事無小大輒言久之出為工部員外郎
知廬州進戶部直昭文館知桂州於伏波山
北建蒙亭李師中記之

陸誥字介夫餘杭人熙寧初以集賢殿脩撰
知桂州奏言邕去桂十八驛往時經略使未
嘗行飭武備臣願得一往使羣蠻知有大將
號令因以聲震南交詔可自智高定後交人
浸驕守帥常姑息誥至部其使者黎順宗來
偃蹇如故態誥絀其禮因諭以所當為懾伏
而去誥遂至邕州集左右江四十五峒首詣
麾下閱簡壯丁五萬補置將吏更鑄印給之

軍聲益張交人滋益恭遣使入貢召為天章閣待制知諫院命張田代之英宗戒以毋得改詵法詵在桂時一與僚佐遊伏波山提點刑獄余藻為其題名巖中與者孔延之白均徐印姚原道劉恕

孔延之新喻人宣聖四十七世孫幼孤貧晝則帶經耕鋤夜則然松讀書慶曆間舉進士為廣西轉運判官伏波雉山隱山皆有名所撰瘞宜賊記鏡城北鎮南山

姚原道通州人自縣尉有聲遷職方郎中曾知鬱林先為經略司管勾機宜文字

俞獻可新安人為桂轉運使九月九日宴龍隱獻可自書石其篆大有徐鉉筆意

劉恕字道源筠州人恕少穎悟年十三欲應制科從人假漢晉書閱月皆歸之善說經義充精史學司馬光編次資治通鑑引恕共事恕於魏晉以後事考證差謬最為精詳與安石有舊欲引實三司條例恕以不習金穀為

辭因言天子方屬公大政宜恢張堯舜之道以佐明主不應以利為先又條陳所更法令不合衆心者勸使復舊至面刻其過安石怒怒不少屈然性喜讀書最甚宋敏求知亳州家多書恕枉道借覽閉閣晝夜口誦手抄留旬日盡其書而去目為之翳熙寧初曾為桂經略司勾當公事與陸誵遊伏波山

和斌字勝之濮州鄆城人任廣西鈐轄平儂智高有戰功改秦鳳廣西以蠻事乞留秦州亦請之詔留廣西累歲徙涇原召對議者謂交州可取斌盛言有害無益願戒邊臣無妄動神宗嘆曰卿質直如此乃知兩路爭卿為不誣矣在桂時斌獨游伏波山

蕭固字幹臣新喻人為廣西轉運使察儂智高有反狀豫條上羈縻之策於樞府時不能用後智高反一如所料人始服其有先識名列華景宋咸所為記中

張田字公載澶淵人知廬州治有善蹟移桂

州異時蠻使朝貢假道經桂與方伯抗禮田乃厚犒之絀其儀蠻不敢校土人劉紀盧豹素為邊患終田在官懾然斂迹或告交趾盛兵襲特磨道諸將請益兵田曰此虛聲也必其國有故張以恐我爾後果如田言宜州人魏利安負罪亡命西南龍蕃從其使入貢凡十反至是龍以烈來復從之田因其入詰責之梟其首欲并斬以烈叩頭流血請命田曰汝罪當死然事幸在新天子即位赦前汝自從

朝廷乞恩乃密請貸其死熙寧初加龍圖閣知廣州治尚清嚴起欽賢堂繪古清刺史於中日夕拜之蘇軾嘗讀其書以侔古廉吏先是唐介司馬光交劾之介以田奏減執政而下祿享賚費論其虧損上恩光遂指為傾險然史著田為人伉直自喜好嫚罵使氣陵人故多失士大夫意及身死而人亦不哀名在龍隱巖後其子壽之赴官合浦道出桂林覩田題名悲感為記其孫脩武即光祖後四十

年再至重為書之

燕肅字穆之益都人遷中侍御使提點廣南西路刑獄與俞獻可李誥同游七星山

孫覽字傳師高郵人以寶文館代制知桂州所著有獨秀山五詠堂記及雉山有題名

曾布字子宣南豐人元豐元年知桂州二年開七星之東巖與其僚屬遊管勾常平劉誼為記布自作詩轉運副使苗時中提點刑獄劉宗傑彭次雲提舉常平齊諶皆和之楊損尚用之亦繼有詩布為人詳具姦臣傳

苗時中字子居其先自壺關徙宿州之符離遂為符離人所至皆有惠政其為廣西轉運副使師討交人罪次富良江久不進時中曰師無進討意賊必從間道來乘我不備冀萬一之勝可密備之既而果從上流來及戰敗始納款後加直龍圖閣知桂州進寶文閣待制仕學規範載時中曾為臨桂令頃於諸山所鑄得宋知臨桂者梁庚唐鏐西門賞陳舜

韶斛邁其名皆不見於郡志僅存送臨桂令
戴若訥一詩而已惜無能述時中以下治邑
所施行者

劉誼字宜父長興人熙寧中持節南方請罷
買沉香減鹽價四十餘事上稱其論事有陸
贄之風王安石銳意新法極諫不便坐黜以
歸乃隱居三茅山有文集奏議行於世桂林
志亦載其奏免役錢為桂名宦云與誼同時
遊曾公巖者洛陽劉宗傑歷湯齊謀吉水彭
次雲又有尚用之江都人郡志謂用之愛桂
風土因留家焉

張頡字仲舉其先金陵人徙鼎州桃源為廣
西轉運使頡謂建廣沅為順州無益朝廷從
其議坐粹罵叅軍沈竦罷歸未幾以直集賢
院知齊澹二州進直龍圖閣知桂州入覲帝
首言卿嚮者論順州不可守信然時有獻言
者謂海南黎人陳被蓋五峒酋領異時盛強
且為中國患今請出兵自効宜有以撫納之

命頡處其事頡使一介往呼之出補以牙校
喜而去詔問何賞之薄對曰荒徼蠻蛋無他
覲得是足矣尋罷兵海外訖無事久之轉運
使馬默劾其經理宜州蠻事失宜罷職知均
州哲宗立還故職知鳳翔廣州召為戶部侍
郎頡所歷以嚴致理而深文狡獪右司諫蘇
轍論其九罪執政以頡雖無德而才可用不
報龍隱巖有頡名

周駸汝南人知桂州與轉運判官安定梁戴
提刑隴右李永德為七星之遊永德惟清次
子家世在惟清本傳

譚揆字文初曲江人提舉廣西常平歷轉運
副使曾徧遊諸山最愛龍隱手自題石伏波
有其兩弟拱朴名又有譚振或揆族也雉山
遊者有劉曄亦其里人

曹輔字子方海陵人與蘇軾秦觀游為廣西
提刑於玄風洞有遇歐陽晦夫詩晦夫名闢
桂州人自有傳

留怙字彥強西安人元符間與府帥黃忱同
遊龍隱衢志稱其庶遜歷事五朝僅至刑部
郎戴安仁質夫亦衢人提舉學事

章峴浦城人提點廣西刑獄龍隱伏波雉山
皆有詩姑蘇志稱其兄岷與峴及弟岵嶙皆
以文詞清麗有名當世

彭子民湘陰人為廣西察訪董必之屬官時
蘇軾謫儋州董媚時宰欲遣人害之彭顧泣
曰人各有子孫董感悟止令小使臣迫出官
舍子民官至員外郎曾於南溪諸山與陶遠
諸人遊子民字彥脩

劉蒙字資明宜黃人提點廣西刑獄為人清
潔不可干以私所得補官先二弟而後二子
在桂時與程節遊龍隱巖鑄有名

胡宗回字醇夫用廢登第紹聖初以直龍圖
閣知桂州進寶文閣待制坐繫平民死降集
賢殿脩撰知隨州名在伏波山

徐常字彥和浦城人紹聖間提舉常平從知

桂州胡宗回遊龍隱

李宗儀字唐輔江夏人與從弟宗儒四世同居相友愛好學獨行嘗為廣西提刑龍隱有宗儀與張覲關杞諸人名

關杞字蔚宗會稽人熙寧間提舉常平先是有提刑余藻與其同時人遊諸山凡所題名多杞與藻手筆

王祖道字若愚福州人以直龍圖閣知桂州蔡京開邊祖道誘王江酋楊晟免等使納土

張大其詞言嚮慕者百三十峒五千九百家十餘萬口宜開建城邑制百蠻以武臣為守置溪峒司主之詔以為懷遠軍且頒諸司使至殿侍軍將告命使第補其首領置二砦為立學又開置允格第州與張莊先後其事共要官賞

張莊者應天府人字正民為廣南西路轉運使希祖道旨銳意拓邊尋代祖道以集賢殿知桂州自撰平允從州城寨記歸功祖道論

者以為虛美中書舍人宇文粹中言祖道及
莊擅興師旅啓釁徼功妄言諸蠻效順納款
得地當時柄臣攬為綏撫四夷之功奏賀行
賞張皇其事自昔欺君無大於此朝廷既追
貶祖道莊責舒州團練副使永州安置再貶
連州其後有程鄰亦襲莊迹而起

程鄰字欽之鄱陽人也父節紹聖間帥桂繕
脩逍遙樓更名曰湘南復於揭帝塘上建八
桂堂皆李彥弼為之記鄰代父政仗其才智欲

招徠外夷以視廣土遂建築隆兌之議論者
以為得不償失大氏祖道及鄰皆以拓地受
上賞而朝廷受其敝云祖道與莊及陳邁諸
人遊龍隱者二祖道被召與莊遊清秀者一
龍隱有節小像彥弼贊之曰玉立千仞陂注
萬頃神抱天倪明韜內景卷舒幄籌闔開蠻
嶺聲纏斗南功篆金鼎又有崇寧間獎諭勅
書文多不載節字信叔有與米元章往來詩
鄰則無足稱者

陳邁字亨伯零陵人轉運判官從王祖道游龍隱邁在真州曾收治花石網榷漕河者風裁凜然後死於中山之難陶逵與弟迥皆零

陵人

米芾字元章其先襄陽人建中靖國元年真州東園以詩送教授推官李彥弼兼簡桂帥程節節亦有詩答之彥弼將芾與節所答并鑱之龍隱巖伏波山鑱有芾小像旁有芾與潘景純熙寧七年同遊名備考其年是時芾

僅十七八歲方信孺謂其尉臨桂來遊疑無是事史與蔡天肇所為芾墓志但云尉浚先題名或好事者為之信孺好奇力辯非一像有高宗贊乃芾曾孫秀實為靜江府支使所携至者景純嘉興人熙寧間曾知永州

李彥弼字端臣廬陵人才藻橫放恒自擬李翰林白然撰製特尚新奇亦其癖也在桂當程氏父子之間作湘南樓八桂堂築兗州三記皆侈麗可觀又曾與曹邁遊玄風洞有長

句鑄之壁乃其子昂霄書大氏彥弼父子皆喜
效米芾書米亦有送彥弼教授桂林詩留桂
最久其官惟見稱權通判桂州軍疑或止此
古志僅載其科名不及其為人必負才陵物
不為鄉里所稱道者時從事周刊記釋迦寺
然才微遜李

謝勳字致遠建安人政和三年春與同時李
溫田永年裴峽楚執規楊書思遊雉山及壘
綵之石門洞勳舉進士而有軍功其破黃安
俊親禱巢穴擒安俊斬之以功轉右武大夫
建寧志謂其膂力過人云

朱輅字國器郴人政和間曾與韓靖諸人遊
龍隱

吳億字大年蘄春人瀕山之水月洞及龍隱
皆有億所篆但自稱為谿園居士

沈起字興宗以天章閣待制知桂州先為轉
運時與提刑章峴遊隱山

劉彛字執中福州人直史館知桂州龍隱有

彝與張覲諸人題名桂自蕭注始建滅交之策其後起彝相繼欲規以為功交因寇邊寢不可制事聞貶起團練使安置郢州徙秀卒彝貶筠州團練副使安置隨州又除名為民編隸循州徙襄州

洪彥昇字仲達饒州樂平人嘗辟廣西經略府或稱其材權提舉常平御史中丞石公弼薦其提舉廣西學事與譚棫及其鄉人程鄰以臘月遊龍隱

李昇之為轉運副使與譚振尚肅之黃鐸遊伏波有詩乘月泛灘江月日以詩視章峴峴欣然為和宋史趙良嗣傳言良嗣已竄柳州詔廣西轉運副使李昇之即所至梟其首張澂以監察御史亦臨斬童貫貫時竄吉陽軍澂於桂聞貫未至乃往南雄誅之澂有龍隱巖詩

董必字子疆宣州南陵人時章惇與蔡卞將大誅流人遣呂升卿往廣東必往廣西察訪

哲宗既止不治然必所至猶以慘刻按脅立
威謀遣人渡海害蘇軾以其屬彭子民泣諫
而止必與孫覽諸人一宴遊雉山

蔡懌字樂道膠州人宣和間知桂州伏波七
星魯公龍隱皆有所至之迹與之遊者提點
刑獄尚用之仲明廉訪使者張洵仁仲又有
清源劉鎡逢時晉江呂汴子會祥符馮元震
亨之襄陵侯材晉卿蒼溪王蕃子宜張洵浚
儀人

許彥先字覺之南雄始興人累官殿中丞遷
廣南西路轉運使熙寧六年與張覲諸人遊
龍隱彥先自題名於石其官稱但曰察訪廣
西公事似以使至尚未為轉運時也

林保字芑民鄞人兩辟主管機宜文字時將
士率俘平民冒賞保覈正之全活為多家居
十餘年安貧著書後官至權吏部侍郎假本
曹尚書以敷文閣待制奉祠伏波山有保宣
和庚子同三衢毛子嘉等所題名

濰山人曰老子有言治大國若烹小鮮嗟乎
大國尚爾况理小國者乎又云小國寡民使有
什伯人之器而不用使民重死而不遠徙雖
有舟輿無所乘之雖有甲兵無所陳之信斯
言也蓋莫若以簡靜弘風教哉况桂全部曾不
當江河南北一大郡山童而不材水淺而無
所畜加以苗夷時肆毒螫不有長者護視之
寬其徵發薄其調斂苗非深入不輕議兵民
胡以有樂生之心一反此道騷然煩費欲求
安富何日之有故曰民之難治以其上之有
為是以難治民之輕死以其求生之厚是以
輕死夫民輕死則難乎為上矣至謂佳兵不
祥孰謂伯陽而不達於治國哉漢文最稱明
主曹平陽亦賢相國略用之以臻清淨之治
宋因制法要在保民如傳中柳開黥卒不應
條收下御史獄胡宗回妄繫平民至死亦罔
不按以劾祖道諸人伸國威以恢王略何不
可者宋史力詆其非似皆不能坐進此道者

也或曰子儒而談老可乎曰吾桂小國也簡
靜者是使桂樂生之方也是孔老之所同也
不然何以敬簡臨民之言為然也

卷四

